

**Uunga siunnersuut: Aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisaat nr. xx, xx. xxx 2015-imeersoq**

(Aningaasaqarnermut Aatsitassanullu Naalakkersuisoq)

**Saqqummiussissut**

(Aningaasaqarnermut Aatsitassanullu Naalakkersuisoq)

**Siullermeerneqarnera**

Aningaasarsianit akileraarutit pillugit Inatsisartut inatsisaata allanngortinneqarnissaanik siunnersuut Naalakkersuisut sinnerlugit matumuuna saqqummiutissavara.

Erngup nukinga pillugu inatsit naapertorlugu akuersissuteqartoqarnerani selskabit akileraarutaannut taarsiullugu akiliummik aalajangersaasoqarsinnaanissaa Naalakkersuisut siunnersuuti-gaat. Siunnersuut erngup nukinga pillugu inatsimmi nutaami 2014-imi akuersissutigineqartu-mi § 12-imut aamma aalajangiiffigisassatut siunersuummut (UKA2012/113-imut) 2012-imi ukiakkut ataatsimiinnermi akuersissutigineqartumut attuumassuteqarpoq. Aningaasarsianit akileraarutit pillugit inatsimmi § 3, imm. 3 allannguinnikkut, aatsitassat pillugit inatsit naaper-torlugu akuersissutinut aamma erngup nukinga pillugu inatsit naapertorlugu akuersissutinut atuutilissaaq.

Aningaaseriviit taarsigassarsiniartarfiillu sullitamik taarsigassarsiaminnik utertitsisinnaan-ginnerat ilaanneeriarlutik nassuerutigisariaqartarpaat. Annaasat akileraartarnikkut aatsaat ilanngaatigineqarsinnaasarpur ilumut annaaneqarnerat annaaneqartullu amerlassusiviat paasi-neqaraangata. Taamaakkaluortoq aningaaseriviit taarsigassarsiniartarfiillu taarsigassarsiaritita-minnik annaasaqarnissamut immikkoortitaminnik akileraarutitigut ilanngaateqarsinnaapput. Aningaaserivinnut taarsigassarsiniartarfinnullu immikkut aaqqissuussineq inatsisitigut erseq-qissumik tungavilerumallugu aaqqissuussinerup taassuma inatsisiliuunneqarnissaa maanna siunnersuutaavoq.

Suliassat aalajangersimasut ilaasa sularineqarnissaannut atatillugu avataaniit suliartortut ta-makkiisumik akileraartarnermik aaqqissuussinermi pineqartunut ilaasinnaapput. Tamakkiisu-mik akileraartarnermik aaqqissuussineq akileraarutit akiliisitsisarnermik pisariillisaanissa-mik siunertaqarpoq. Aaqqissuussinerup, sulisut tamakkiisumik akileraartartut 350.000 kr.-init ikinnerusunik aningaasarsiallit erniatigut isertitaasa, erniatigut aningaasartuutaasa iluanaaruti-siaasalu Kalaallit Nunaata avataaneersuneersunit pisut akileraaruserneqartussaajunnaarsinne-qarnerisigut suli pisariinnerulersitsinissaa paasinarsisimavoq. Siunnersuutip kingunerisaanik isertitassatigut annaaneqartussat allaffissornikkut iluaqutissanit qaangerneqangaatsiarnissaat naatsorsuutigineqarpoq.

Taamatut oqaaseqarlunga siunnersuut Naalackersuisut sinnerlugit matumuuna Inatsisartunut suliaassangortippara, aammalu Aningaasaqarnermut Akileraartarnermullu Ataatsimiititaliami suliarineqareerpat aappassaaniigassangortillugu.